

Nefndasvið Alþingis
Austurstræti 8–10
150 Reykjavík

Reykjavík, 26. janúar 2015

Efni: **Pingskjal 586 — 403. mál.: Frumvarp til laga um örnefni.**

Íslensk málnefnd fékk til umsagnar frumvarp til laga um örnefni í apríl 2014 og sendi svar 29. Sama mánaðar. Hún fagnar þessum áfanga þar sem löngu er tímabært að endurskoða örnefnalögin. Hún telur þau vel samin og til mikilla bóta.

Málnefndin vill nú ítreka að hún tekur undir 4. gr. frumvarpsins þar sem lagt er til að Íslensk málnefnd tilnefni einn fulltrúa í örnefnanefnd. Hún hafði áður áheyrnarfulltrúa en þessi tillaga er mun eðlilegri og í samræmi við hlutverk Íslenskrar málnefndar. Í lögum um stöðu íslenskrar tungu og íslensks táknmáls nr. 61 frá júní 2011 er í 6. gr. um hlutverk Íslenskrar málnefndar tekið fram að hún skuli veita stjórnvöldum ráðgjöf um íslenska tungu á fræðilegum grundvelli og falla örnefni undir þá skilgreiningu.

Virðingarfyllst,

Guðrún Kvaran,

formaður Íslenskrar málnefndar

Nefndasvið Alþingis
Allherjar- og menntamálanefnd
Austurstræti 8-10
150 REYKJAVÍK



Akranesi 26.1.2015

Tilvísun: V201501021


Efni: Umsögn Landmælinga Íslands um frumvarp til laga um örnefni (heildarlög), 403. mál

Vísað er til erindis allherjar- og menntamálanefndar Alþingis dags. 22. janúar 2015 þar sem óskað er eftir því við Landmælingar Íslands að stofnunin veiti umsögn um frumvarp til laga um örnefni (heildarlög), 403. mál.

Landmælingar Íslands fagna framkomnu frumvarpi en skv. því er hlutverk stofnunarinnar við skráningu og miðlun örnefna fest í sessi. Ágætt samráð var haft við Landmælingar Íslands við samningu frumvarpsins og lýsir stofnunin yfir ánægju með þau vinnubrögð.

Þær athugasemdir sem stofnunin vill koma á framfæri vegna frumvarpsins eru:

1. Í 7. grein er fjallað um nafngiftir nýrra náttúrufyrirbæra og í 5. grein er fjallað um úrlausnir örnefnanefndar. Hvort tveggja hefur áhrif á örnefnagrunn Landmælinga Íslands skv. 9. grein en ekki er tekið á tilkynningaskyldu úrskurðaraðila til Landmælinga Íslands þannig að örnefnagrunnur sé sem réttastur á hverjum tíma. Á þessu þyrfti að skerpa, a.m.k. í skýringum.
2. Skv. 9. gr. er ráðherra heimilt að kveða á um í reglugerð um innihald, skráningu og tilhögun örnefnagrunns. Landmælingar Íslands benda á að kostnaður við viðhald örnefnagrunnsins mun að einhverju leyti byggjast á þessari reglugerð en í dag hefur stofnunin ekki sérstaka fjárveitingu í verkefnið. Þar gæti t.d. verið um að ræða kröfu um mjög nákvæm og nýleg grunngögn eins og háupplausnar gervitunglamyndir þar sem árlegur kostnaður við kaupa á gögnum getur numið nokkrum milljónum.
3. Varðandi 11. gr. 1.tölulið, stafl. b. skal bent á að Landmælingar Íslands hafa þegar uppfyllt skilyrði um gjaldfrjálst aðgengi og endurnot örnefnagrunnsins auk þess sem almenningur hefur haft aðgang að skráningu örnefna í örnefnagrunn stofnunarinnar um nokkurra ára skeið. Þessi aðgangur er þó háður því að einstaklingur sem vill skrá örnefni hafi sérþekkingu á staðhättum á því svæði sem hann fær til skráningar.
4. Í frumvarpinu er hlutverk Stofnunar Árna Magnússonar í íslenskum fræðum skerpt og vægi þess aukið. Landmælingar Íslands vilja benda á að til þess að það sé hægt þarf að tryggja fjármögnun þessa mikilvæga verkefnis.

Virðingarfyllt

 Magnús Guðmundsson
 forstjóri Landmælinga Íslands



Alþingi

Málsnr.: 141155
Málalykill: 0342

SAMBAND ÍSLENSKRA SVEITARFÉLAGA

Alþingi
b.t. allsherjar- og menntamálanefndar
Austurstræti 8-10
150 Reykjavík

Reykjavík 29. janúar 2015

1405003SA KB/tp
Málalykill: 401

Efni: Frumvarp til laga um örnefni – 403. mál 144. lp.

Vísað er til tölvupósts frá nefndasviði Alþingis, dags. 22. janúar sl., þar sem ofangreint þingmál er sent til umsagnar hjá Sambandi íslenskra sveitarfélaga.

Frumvarpið hefur áður verið til umfjöllunar, sbr. 481. mál á síðasta löggjafarþingi. Við framlagningu frumvarpsins nú hafa nokkrar breytingar verið gerðar á frumvarpstextanum en að mati sambandsins hafa þær ekki áhrif á hlutverk sveitarfélaga gagnvart skráningu örnefna og staðfanga.

Efnisatriði í umsögn sambandsins, dags. 5. maí 2014 (erindi nr. P 143/1770), eru því endurnýjuð. Sérstök áhersla er lögð á að orðið verði við tilmælum í umsögninni um samráð við setningu reglugerða.

Minnt er á að allsherjar- og menntamálanefnd gerði það að tillögu sinni við meðferð málsins á 143. löggjafarþingi (sbr. nefndarálit dags. 15. maí 2014) að við reglugerðarheimild ráðherra skv. 12. gr. laga um skráningu og mat fasteigna kæmi sú viðbót að reglugerðin verði sett að höfðu samráði við Samband íslenskra sveitarfélaga.

Virðingarfyllst

SAMBAND ÍSLENSKRA SVEITARFÉLAGA

Karl Björnsson
framkvæmdastjóri

29.1.2015

Frumvarp til laga um örnefni – 403. mál

Umsögn til allsherjar- og menntamálanefndar Alþingis.

Örnefnanefnd lýsir yfir ánægju með frumvarp til laga um örnefni og vonar að lögin hljóti staðfestingu á yfirstandandi þingi.

Nefndin gerir tillögu um viðbót við eina grein frumvarpsins. Við 4. gr. bætist nýr c-liður og aðrir liðir færast aftar. Liðurinn hljóði svo:

„c. að úrskurða um nöfn á skiltum á vegum opinberra aðila.“

Rökstuðningur:

Víða um land eru dæmi um röng nöfn eða ranga rithætti á skiltum á vegum opinberra aðila, t.d. Vegagerðarinnar eða sveitarfélaga. Mikilvægt er að nefndin geti hlutast til um þessi mál í ljósi þess að eitt meginmarkmið frumvarpsins er að stuðla að verndun örnefna og nafngiftahefða, sbr. 1. gr.

Nefndin vill ennfremur ítreka, eins og kom fram í undirbúningi starfshópsins sem samdi frumvarpið, að þar sem um ný verkefni er að ræða sé nauðsynlegt að ráða starfsmann á Nafnfræðisvið Arnastofnunar til að sinna þeim. Nefndin leggur áherslu á að þetta verði tekið til greina til að tryggja framkvæmd laganna.

Virðingarfyllst,

F.h. Örnefnanefndar

Þórunn Sigurðardóttir, formaður Örnefnanefndar